
GIRAUD DE SALIGNAC.

I.

A vos cui tenc per dona e per senhor,
Bona dona, volgra clamar merce
Per un' amor que debes vos mi ve,
Que m destrenh tan que, si'n breu no m secor
Vostre gen cors, non puesc vius remaner:
Et anc no vos o auzei far parer;
E si us en sui cent vetz vengutz denan,
Pueys, quan vos vey, no us aus dir mon talan.

Ans qu'ieu vos vis, vos aic tan fin' amor
Qu'ieu non amava tant autrui ni me;
Quan vos vi pueys, doblat l' amors desse
E trobey vos a mos huelhs pus gensor
Qu'ins en mon cor no us sabia vezer,
Tant c' autr' amor mi fetz del cor mover;
Mas la vostra no s'en part tan ni quan,
Et empero anc no hi ac tan gran.

Non esgardetz ves mi vostra ricor,
Humilitat esgardar hi cove
Per amor dieu, e s' autre pro no m te,
No m tengua dan, s'ieu vos dic ma clamor;

Quar ges, dompna, no m'en puesc estener,
Si m'fors' amors que m' ten en son poder;
E de senhor deu hom far son coman,
Pus que partir no s'en pot on que an.

No m'tenguan dan ab vos devinador
Ni lauzengier cui dieus de mal estre;
Sitot ab lieys qu'enguanet mi e se
Mi tengron dan, pero non fatz clamor,
Quar anc en re no la'n vim mais valer,
Ni anc despueys no fetz mas decazer;
Per qu'ieu la'n vey per tos temps a mon dan,
E do m'a vos lial e ses enjan.

El mon non a rey ni emperador
Que puesc' aver mais de fin pretz ab se
Que ieu, dompna, si vos mi voletz be,
Ni m'retenetz per vostre servidor;
En vos podon complir tug mey voler,
Mas ieu m'en prenc so que non aus querer,
A quascun jorn cinc cens bais en pensan,
De que non tem gelos ni mal parlan.

Bella dompna, de vos puesc dir en ver
Que de fin pretz, d'amicx e de poder
Creyssetz totz jorns, e us anatz melhuran,
Qu'otra dompna del mon ges no val tan.

II.

PER solatz e per deport
Me conort
E m don alegransa ;
E ja no feira descort ,
S'ieu acort
E bon'acordansa
Trobés ab lieys qu'am pus fort ;
C'autre tort ,
Vos dic ses duptansa ,
No l'ai mas l'amor que 'l port.
Pieitz de mort
Me vol per semblansa ;
Mas de lauzengiers mi lau ,
Quar fan cuidar qu'ieu am alhors ,
E pueys demandon que fau ,
Ni on ai pazada m'amors ;
Et ieu , quar soi mals e brau ,
Tem los tan que dirai la lor ;
La genser es qu'hom mentau ,
E la mielher de sa ricor ;
Francha , de bella paria ,
Gen parlans , e de belh solatz
La trobaretz quascun dia ;
E tot quan fai ni ditz platz ;
Sens e pretz e cortezia ,
Guaieza e fina beutatz
Estan ab lieys nueg e dia.

Sitot enueia als malvatz
D'al re non cossire,
Mas s'amor dezire
Que m des;
Son dous plazen rire
M'a donat martire
Engres;
On qu'ieu m'an ni m vire
El cor la remire
Ades;
E pes e cossire,
E non l'aus ges dire
Que m'ames,
Qu'el sobramors qu'ieu l'ai m'en te,
E paors que l'enueg desse;
Mas en luec de clamar merce
L'ai fin'amor e bona fe;
Qu'en tan quan mars ni terra te
Non a tan fin aman cum me.
La valens reyna mante
Domney, fina beutat ab se
Part totas las dompnas qu'hom ve;
E non ai sobredig de re.
De Monferiol non dic re,
Mas valor e fin pretz mante.

GIRAUTZ DE SALAINGNAC.

7225.

GIRAUTZ DE SALAINGNAC si fo de Caersin , del castel de Salaignnac.
Joglars fo , ben adreg hom fo e ben cortes , e trebet ben e gen
cansons e descortz e sirventes.

7225.

ESPARVIERS et austors ,
E guirfals prendedors ,
E falcos voladors ,
E smirles montadors
Voill eu , e pro de renda
Am que met' e despenda ,
Qu'enaissi m'er honors ;
Que à totz los meillors
Voill far don et esmenda.

Mos levrers volvedors ,
Liamers frezadors
Voill e los venadors ,
E chins de sers odors ,
E qu'eu lo glat entenda ;
Be m platz aital fazenda :
E voill bos cantadors
E bos violadors ,
Car solas si remenda.

Palafres ambladors ,
Beus e plan portadors ,
E destres corredors ,
Mans seingnals de colors
Voill eu e manta tenda ;
E qu'om per tot mi venda
Tan qu'en don' als plusors.
Als grans et als menors
Voill donar lor vivenda.

Reis et emperadors ,
Ducs , marques e comtors ,
Castellans , valvasors ,
Tant es grans ma ricors
Queus voill , à mi s'atenda
E mos pretz noi descenda.
Tant voill d'envaidors ,
Que castel fort ni tors
Contra mi no s defenda.

Los livres dels auctors
Sai , e dels ancessors
Los sens e las follors.
Res no m faill mas amors ,
O genser qui port benda
Voilla c'à mi se renda.
Si tot s'es caps e flors
De totas las gensors ,
De mi merces vos prenda.